

- संसद रो शीतकालीन सत्र आज सरू व्हयो-प्रधानमंत्री नरेन्द्र मोदी संसद रो समय दुनिया मांय भारत रो मान बधावण सारू काम लेवण माथे ज़ोर दीनो।
- 75 वों संविधान दिवस काल मनायो जावेला।
- मुख्यमंत्री भजन लाल शर्मा कह्यो-चिकित्सा अर स्वास्थ्य हलका माथे सरकार रो खास ध्यान।
- जयपुर रा एक मरीज मांय जीका वायरस री ठा पड्यां पाछे चिकित्सा अर स्वास्थ्य विभाग रोकथाम सारू असरदार जतन करण रा हुकम दीना।

संसद रो सिंयाळू सत्र आज सरू व्हयो। ओ सत्र 20 दिसम्बर तांई चालेला। सत्र ऊं पैली खबरनवीसां सागे बातचीत करता थकां प्रधानमंत्री नरेन्द्र मोदी कह्यो के ओ सत्र संविधान रो मसौदो पास व्हेवण रा 75 साल समेत केई कारणां ऊं खास रेहवेला। विपक्ष री आलोचना करता थकां प्रधानमंत्री कह्यो के कुछ लोग अव्यवस्था पैदा कर र संसद माथे काबू करण री कोशिश कर रह्या है। वे कह्यो के संसद रा बगत ने दुनिया मांय भारत रा मान बधावण सारू काम लियो जावणो चाहिजे। प्रधानमंत्री कह्यो के विश्व मंच पर देश ने जो दुर्लभ मौका मिल्या है वां रो फायदो उठावणो चाहिजे।

000

लोकसभा अध्यक्ष ओम बिरला संविधान रे खतरा मांय व्हेवण रा कुछ वर्गां रा आरोप ने गलत बताया है। वे कह्यो के ई मुद्दा ने ओछा सिसासी नजरिया ऊं नी देख्यो जावणा चाहिजे। संविधान दिवस ऊं पैली आकाशवाणी समाचार सागे खास बातचीत मांय बिरला कह्यो के संविधान देश रा लोगां ऊं जुड्यो है अर समाज रा हर तबका रा ई माथे भरोसो है।

000

लोकसभा अध्यक्ष कह्यो के संविधान दिवस रे मौके म्हाने संविधान सभा मांय व्ही चर्चा ऊं सीख लेवण री ज़रूरत है। श्री बिरला सागे बातचीत रो पूरो कार्यक्रम सात बज र 10 मिनट परां आकाशवाणी रा एफ एम गोल्ड चैनल माथे सुण्यो जा सके है।

000

राज्यपाल हरिभाऊ बागडे संविधान दिवस रे मौके जनता ऊं अधिकारां रा प्रति जागरूक रहता थकां कर्तव्य निभावणो तैय करण बाबत कह्यो है। काल मनाया जावण वाळा संविधान दिवस री शुभकामनावां देता थका राज्यपाल कह्यो के संविधान रो मूल भाव इन्सानियत है। ई बीचे प्रदेश मांय ई संविधान दिवस रे मौके न्यारा-न्यारा कार्यक्रम राख्या जावेला। जयपुर मांय संविधान क्लब ऊं अंबेडकर सर्किल तांई पदयात्रा निकाळी जावेला। कार्यक्रम मांय फौज, राजस्थान पुलिस, आरएसी अर गैर सरकारी स्कूलां विद्यार्थियां री ओर ऊं बैडवादन कर्यो जावेला। पर्यटन विभाग री मदद ऊं पदयात्रा रा गेला मांय न्यारी-न्यारी ठौड़ां सांस्कृतिक कार्यक्रम ई राख्या जावेला अर खुद री फोटो खींचण री ठौड़ां बणायी जावेला। सवाईमाधोपुर रा सूचना केंद्र मांय प्रदर्शनी अर संगोष्ठी रा कार्यक्रम राख्या जावेला।

000

संविधान दिवस रा सिलसिला मांय आज नई दिल्ली मांय हमारा संविधान हमारा स्वाभिमान पदयात्रा राख्यी ज्यी। ई मौके केंद्रीय मंत्री, सांसद, ओलंपिक मांय देश री नुमाइन्दगी कर चुक्या खिलाड़ी अर नौजवान संविधान री प्रस्तावना री शपथ लीनी। पदयात्रा रे दौरान न्यारा-न्यारा सांस्कृतिक कार्यक्रम, प्रदर्शनियां अर संवाद सत्र ई राख्यी ज्यी। पैदल यात्रा पूरी व्ह्यां पाछे खबरनवीसा सागे बातचीत करता थकां केन्द्रीय युवा

कार्यक्रम अर खेल मंत्री डॉक्टर मनसुख मांडविया कह्यो के नौजवानां रा उमाव ऊं आ ठा पड़े है के भारत साल 2047 ताई विकसित देश बण जावेला।

000

मुख्यमंत्री भजनलाल शर्मा कह्यो है के चिकित्सा सेवा रो हलको है अर सेवा मन ने शांति देवण रो काम है। वे आज जयपुर रा एक गैर-सरकारी विश्वविद्यालय रा दीक्षांत समारोह मांय बोल रह्या हा। मुख्यमंत्री कह्यो के चिकित्सा अर स्वास्थ्य माथे सरकार रो खास ध्यान है अर बजट मांय 27 हजार 660 करोड़ रुपया यानि बजट रो 8 दशमलव 26 फीसदी हिस्सो केवल चिकित्सा अर स्वास्थ्य सारू राख्यो है। वे कह्यो के राजस्थान डिजिटल हैल्थ मिशन रे मार्फत रहवासियां ने स्वास्थ्य रिकॉर्ड रो ऑनलाइन सुबीतो मुहैया करायो जा रह्यो है। श्री शर्मा कह्यो के राज्य सरकार मुख्यमंत्री आयुष्मान आरोग्य हेल्थ इन्फ्रास्ट्रक्चर मिशन रा तहत ईलाज ऊं जुड़्या बुनियादी ढांचा ने बेहतर बणा रही है, जिण रा तैत स्वास्थ्य हलका मांय 3 सालमांय 15 हजार करोड़ रुपया रा काम कराया जावेला। मुख्यमंत्री कह्यो के 9 ऊं 11 दिसम्बर बीचे व्हेवण वाळी राइजिंग राजस्थान ग्लोबल इन्वेस्टमेंट समिट रे ज़रिए चिकित्सा अर स्वास्थ्य समेत हर हलका मांय निवेश लायो जा रह्यो है अर हाल ताई 25 लाख करोड़ रुपया रा करार कर्या जा चुक्या है। कार्यक्रम मांय मुख्यमंत्री मेडिकल री न्यारी-न्यारी डिग्रियां हासिल करण वाळां ने सोना रा तमगा अर डिग्रियां दे र नवाजी ज्या।

000

जयपुर मांय बजाज नगर हलका रा रहवासी एक जणा मांय जीका वायरस री ठा पड़्या पाछे चिकित्सा अर स्वास्थ्य विभाग इण री असरदार रोकथाम अर इण ने काबू करण बाबत् काम करण रा हुकम दीना है। ई मरीज री हीमोफैगोसाइटोसिस लिम्फो हिस्टोसाइटोसिक सागे हाई बी.पी. अर हेपेटाइटिस रे कारण मौत व्हे ग्यी ही। ई मरीज मांय जीका वायरस री ई ठा पड़ी ही। स्वास्थ्य विभाग रा निदेशक जनस्वास्थ्य डॉ. रवि प्रकाश माथुर बतायो के जीका वायरस रा पसारा री रोकथाम सारू फोर्गिंग, फोकल स्प्रे करण अर नगर निगम कानी ऊं मच्छरां ने रोकण रो अभियान चलावण बाबत् करी ज्यो है। ई सागे ई लोगां मांय वायरस री मौजूदगी री जांच सारू खून अर पेशाब रा नमूना एसएमएस अस्पताल री माइक्रोबायोलॉजी प्रयोगशाला मांय भेजण रा हुकम ई दिया ज्या है। ध्यानजोग है के काल 66 साल रा एक मरीज री दुर्लभ बीमारी एचएलएच रे कारण मौत व्हे ग्यी ही।

000

राज्य सरकार जयपुर नगर निगम —हेरिटेज री काम चलाऊ महापौर कुसुम यादव रो कार्यकाल 60 दिन सारू बधा दीनो है। वां रा पहला 60 दिन रो कार्यकाल 23 नवंबर ने पूरो व्हे ग्यो हो। कुसुम यादव ने 24 सितंबर ने वां बगत री मेयर मुनेश गुर्जर रा निलंबन पाछे काम चलाऊ मेयर बणायी ज्यी ही। ध्यानजोग है के वां बगत री मेयर मुनेश गुर्जर ने भ्रष्टाचार रा आरोप मांय मुअत्तल कर दीरीजी ही।

000

ब्यावर जिला री सरकारी स्कूलां रा विद्यार्थियां री आंख्यां री मुफ्त जांच करायी जावेला। ई सारू जिला प्रशासन री ओर ऊं ब्यावर दृष्टि कार्यक्रम चलायी ज्यो है। जिला कलेक्टर महेन्द्र सिंह खड़गावत आज ई कार्यक्रम रा पोस्टर रो विमोचन कीनो।

000

भरतपुर-जयपुर नेशनल हाईवे नम्बर 21 माथे आज व्ह्या एक हादसा मांय पुलिस रा 5 कर्मचारी घणा जख्मी व्हे ग्या। पुलिस री जीप रे दुपहिया वाहन माथे जा रही एक महिला ने बचावण री कोशिश मांय पलट जावण रे कारण ओ हादसो व्ह्यो। हादसा पाछे मौके पूग्या लोग जख्मी पुलिसवाळां ने एम्बुलेंस ऊं आरबीएम जिला अस्पताल

पूगया। जाणकारी मिलण परां एस.पी. मृदुल कच्छावा समेत न्यारा-न्यारा अहलकार अस्पताल पूग्या अर जख्मी पुलिस वाळां रो हालचाल पूछ्यो।

000

प्रदेश रा पारां मांय उतार-चढाव बीचे ठण्ड रो असर महसूस व्हे रह्यो है। मौसम विभाग रे मुजब रात री बगत सब ऊं कम तापमान 8 दशमलव 8 डिग्री सेल्सियस सीकर जिला रा फतेहपुर मांय दर्ज करी ज्यो। प्रदेश मांय सैर सपाटा री एकली ठौड़ मार्चंट आबू मांय न्यूनतम तापमान 6 दशमलव 4 डिग्री सेल्सियस रिकार्ड करी ज्यो। दिन री बगत सब ऊं बत्तो तापमान 31 दशमलव 4 डिग्री सेल्सियस बाङ्मेर मांय दर्ज करी ज्यो।

000

अंतरराष्ट्रीय महिला हिंसा उन्मूलन दिवस रा सिलसिला मांय आज जागरूकता कार्यक्रम राख्यी ज्यो। केकड़ी रा सरकारी कॉलेज मांय व्याख्यान राख्यी ज्यो। इण मांय डॉ. शिखा माथुर महिलावां रे खिलाफ हिंसा रा कारण अर हिफाजती उपायां री जाणकारी दीनी। वे कह्यो के खुद री हिफाजत सारू महिलावां ने भणाई-लिखाई सागे जागरूक अर खुद रे पाण ऊबी बणणी चाहिजे। वे केंद्र अर राज्य सरकार री महिलावां ने आगे बधावण ऊं जुड़ी योजनावां रा बारा मांय ई जाणकारी दीनी।

000

ऑपरेशन स्माइल" रा तैत आज पाली मांय एक दिन री कार्यशाला राख्यी ज्यी। इण रो खास मकसद ट्रांसजेंडर समुदाय ने वां रा कानूनी हक रा बारा मांय जाणकारी देवणो हो। कार्यक्रम मांय ए.सी.डी. कैसेज रा विशिष्ट न्यायाधीश अजिताभ आचार्य, अर पुलिस महानिरीक्षक प्रदीप मोहन शर्मा थर्ड जेंडर समुदाय रा सवालां रा जवाब दीना।

000

भारत अंतरराष्ट्रीय फिल्म महोत्सव मांय आज क्षेत्रीय फिल्मां रो दर्शाव कर्यो जा रह्यो है। आकाशवाणी सागे बातचीत करता थकां कन्नड़ फिल्म केरेबेटे रा अभिनेता अर निर्माता गौरी शंकर एसआरजी क्षेत्रीय सिनेमा रो जिक्र करता थकां कह्यो के ओ क्षेत्रीय संस्कृति री गहराइयां ने बतावे है। भारतीय पैनोरमा री एक और फीचर फिल्म अर एनिमेटेड प्रोडक्शन महावतार नरसिम्हा रा निर्देशक अश्विन कुमार वां री फिल्म रा चयन सारू आभार जतायो। महोत्सव मांय आज करीब 75 फिल्मां बतायी जा रही हैं।

000